

**TEZAUUR LITURGIC**  
**1 IANUARIE**

**ACATISTUL**  
**SF. IERARH**  
**ATANASIE**  
**VOLHOVSKI,**  
**EPISCOPUL**  
**MOGHILEVULUI**  
**ȘI POLOŢKULUI**  
**II**



**MOSCOVA, 2000**



# **АКАФИСТ**

## **святителю Полтавскому**

### **Афанасию**

#### **Кондак 1**

Избранный от юности угодниче Христов, славу мира нивчтоже вменивый и Господу последствовати возжелевый, темже поношения и гонения паче хвалы вменил еси, и даже до смерти о Церкви Святей болезновал еси, сего ради зовем ти умильно:

Радуйся, многоскорбный святителю Афанасие, радости небесныя причастниче.

#### **Икос 1**

Истины служителя безсмертию соименнаго похвалим Афанасия, сей бо есть скорый помощник и услышатель всякому, тако его поюще:

Радуйся, помощниче наш верный;  
радуйся, молитвенниче о нас усердный.  
Радуйся, в беде сущих покровителю;

радуйся, скорбящих возвеселителю.

Радуйся, согреяние душ хладных;

радуйся, радости душ праведных.

Радуйся, многоскорбный святителю Афанасие,  
радости небесныя причастниче.

### **Кондак 2**

Крестился еси во Христа, отче блаженне, темже  
и во Христа облеклся еси, и на всяк день имя  
Христово призываяй, выну воспевал еси Тому:  
Аллилуиа.

### **Икос 2**

Книжник явился еси, от сокровища церковного  
людем износяй богатство учения словесного.

Сего ради похваляем от паствы твоея тако:

Радуйся, златословесный учителю;

радуйся, истины Божественныя хранителю.

Радуйся, преданий отеческих ревнителю;

радуйся, правоверия насадителю.

Радуйся, ересей искоренителю;

радуйся, зловерия сокрушителю.

Радуйся, многоскорбный святителю Афанасие,  
радости небесныя причастниче.

### **Кондак 3**

Славы земныя никакоже взыскав, всяко  
небесная мудрствовал еси, отче Афанасие, и  
тако скоро земная оставив, прешел еси к  
вожде ленному отечеству небесному, идеже со  
ангелы выну поеши Богови: Аллилуиа.

### **Икос 3**

Языки вси ко Единому Богу привести желаяй,  
всяко и единстве церковнем ревновал еси.  
Темже слышиши от нас:

Радуйся, поборниче единства церковнаго;  
радуйся, образе совершенства духовнаго.

Радуйся, Единого Бога проповедниче;  
радуйся, за имя Христово исповедниче.

Радуйся, зараженный ересию целителю;  
радуйся, младенцев духовных кормителю.

Радуйся, многоскорбный святителю Афанасие,  
радости небесныя причастниче.

## Кондак 4

Животворящий крест всегда пред лицом имеяй  
и всегда крест Христов радостно в житии  
несый; темже ныне во обители возлежиши  
честными мощами твоими в соборном храме во  
имя Креста, и всех на рамена своя крест  
вземший, подвизаеши пети Господу: Аллилуиа.

## Икос 4

Солнцу правды Христу во вся дни жизни  
поработав, ныне зрения вечного солнца  
наслаждаешься, от нас же приемлещи  
милостивно дары похвальные:

Радуйся, истинным светом просветителю;  
радуйся, Солнца правды служителю.

Радуйся, к свету истинному зовый;  
радуйся, из области темныя исторгаяй.

Радуйся, светильниче на свещнице церковнем;  
радуйся, сияяй светом духовным.

Радуйся, многоскорбный святителю Афанасие,  
радости небесныя причастниче.

## Кондак 5

Исцеляяй всяк недуг и всяку язю Христос  
дарова тебе силы недуги препобедити и  
победная улучити, Господеви воспевая:  
Аллилуиа.

## Икос 5

Священник Бога Вышняго был еси непорочен, и  
инок изряден, Слова Божия возвеститель и о  
пастве усердный молитвенник, темных  
просветитель и исповедник имени Божия. Сего  
ради приими от нас сицевыя тебе похвалы:

Радуйся, апостолам равный;

радуйся, с мученики славимый.

Радуйся, Слова Божия проповедниче;

радуйся, терпеливодушный исповедниче.

Радуйся, преподобных сомолитвенниче;

радуйся, святых всех сомолитвенниче.

Радуйся, многоскорбный святителю Афанасие,  
радости небесныя причастниче.

## Кондак 6

Сердце твое, исполни благодати и истины, плод воистину Богови принесся чистый, на немже, яко на олтари, на всяк день жертва словесная приносися Богови, песнь же красная воспевашеся: Аллилуиа.

## Икос 6

Слово твое в силе духа дивная сотвори, яко неправовернии к благочестию возвратишася, неблагонамереннии же изрядни в добрых делах явишася. Все же воспеша ти благодарственно:

Радуйся, учителю правоверия;

радуйся, обличителю зловерия.

Радуйся, нравов благих насадителю;

радуйся, злонравия искоренителю.

Радуйся, образе верным благий;

радуйся, ко Господу многих приведый.

Радуйся, многоскорбный святителю Афанасие, радости небесныя причастниче.



## Кондак 7

Пчелою трудолюбною паству твою питал еси медом чистаго учения Православнаго, обаче о инаковерных болезнуяй, и тех любових твоею объемлюще, многи к познанию истины привел еси, да вси единеми усты и едином сердцем Господеви поют: Аллилуиа.

## Икос 7

Новый разум дарова ти Христос, смысл же лучший и ветхаго изряднейший. Сие видяще, восхваляем Господа, и тя поем сице:

Радуйся, разума Божия восприятелю;  
радуйся, смысла просящим подателю.

Радуйся, имеяй разум Богом просвещенный;  
радуйся, скорый помощниче оскорбленным.

Радуйся, небесная умом созерцай;  
радуйся, скорбящим скоро помогаяй.

Радуйся, многоскорбный святителю Афанасие,  
радости небесныя причастниче.

## Кондак 8

Мечем слова Божия всяко терние посека еси, да вси правым смыслом и чистым сердцем притекут ко Святей, Соборней и Апостольстей Церкви, Богу поя: Аллилуиа.

## Икос 8

Имя Божие прославить хотяи, никакоже убоялся еси поношений и клеветы. Темже, даже и до смерти пострадав, на небеси ныне покоишися, от нас же слышиши воспевания:

Радуйся, яко о славе церковней возревновал еси; радуйся, яко в уничижении никогдаже возроптал еси.

Радуйся, земных презрителю мудрый; радуйся, небесных искателю верный.

Радуйся, Господу последователю верный; радуйся, делателю Заповедей примерный.

Радуйся, многоскорбный святителю Афанасие, радости небесныя причастниче.

## Кондак 9

Чашу страданий Христовых прияти возжелев,  
иго благое на рамена своя восприим, и чрез все  
житие твое верный раб был еси, выну поя  
Господеви: Аллилуиа.

## Икос 9

Корень смирения твоего израсти добродетели  
твоя, всеблаженне отче Афанасие, яже ныне  
зряще, дерзаем хвалити тя сице:

Радуйся, в кротости и милосердии древним  
святым равный;

радуйся, радости духовныя сосуде избранный.

Радуйся, мир Божий в сердце выну имеяй;

радуйся, благостию пламеней.

Радуйся, долготерпение и воздержание  
стяжавый;

радуйся, любовью твоею добродетели твоя  
увенчавый.

Радуйся, многоскорбный святителю Афанасие,  
радости небесныя причастниче.

## Кондак 10

Спасения паствы ищай и о Церкви болезнуяй,  
отче Афанасие, вольным хотением сокрыл еси  
свещильник свой, яко да возсияет в Царствии  
Небеснем огонь смирения твоего, да сподобишися  
по скорби и поношении пети с небожителем  
радостно: Аллилуиа.

## Икос 10

Честь от людей не приял еси в житии твоём,  
отче, обаче от Бога почтен и чудесами от мощей  
твоих прославлен, ходатайствуеши о чтущих тя  
и поющих сие:

Радуйся, честь небесную паче земных  
возлюбивый;

радуйся, славу от Господа паче человеческого  
возжелевый.

Радуйся, похваления от Творца приимый;

радуйся, благодарения от людей выну слышай.

Радуйся, почести горняго звания восприявый;

радуйся, величия небеснаго вкусивый.

Радуйся, многоскорбный святителю Афанасие,  
радости небесная причастниче.

## Кондак 11

Вышняго царствия взыскавшу ти, к нижним  
никакоже прилепися сердце твое. Темже и  
доднесь лица инокинь, собранныи во обители  
Полтавстей, прибегают к покрову твоему,  
научения и вразумления ищущи. Тобою же  
наученнии, во умиление сердца поют  
подвигоположнику Христу: Аллилуиа.

## Икос 11

Яви мощи твоя благий Господь во утешение  
пастве твоей, яко сокровище некое, яко  
утешение и знамение благоволение Своего к  
нам, земнородным. Мы же, любовию честных  
останки твоя лобызающе, верно воспеваем:

Радуйся, долготерпение Господне к нам  
подвигаяй;

радуйся, милосердие Божие на нас обращаяй.

Радуйся, завидящим грозное прещение;

радуйся, превозносящимся явное вразумление.

Радуйся, гордым смирение подаваяй;

радуйся, не искати своего си всех научаяй.

Радуйся, многоскорбный святителю Афанасие,  
радости небесныя причастниче.

### **Кондак 12**

Радости небесныя причащаяся, о Афанасие,  
даруй и нам тоя причастие, да вси по исходе из  
жития сего скорбнаго и многотруднаго  
сподобимся вселиться во обители горния, идеже  
ты со ангельскими лики поеши песнь Богови:  
Аллилуиа.

### **Икос 12**

Душа твоя ныне Богови предстоит, обаче и нас  
земных никакоже забываеши, отче святителю  
Афанасие, темже и мы, аще и недостойнии,  
дерзаем пети тя похвалами сицевыми:

Радуйся, на нас несмысленных не  
раздражайся;

радуйся, на обидящих тебе зла не мысляй.

Радуйся, об истине радуяйся верно;

радуйся, всех любяй нелицемерно.

Радуйся, вся терпети нас наставляяй;

радуйся, николиже отпадати от веры силы нам  
даруяй.

Радуйся, многоскорбный святителю Афанасие,  
радости небесныя причастниче.

### **Кондак 13**

О, многоскорбный святителю Афанасие, в  
житии крест тяжкий неправедных гонений и  
клеветы понесый! Испроси нам у Господа всякия  
скорби претерпети, токмо да Его, Сладчайшаго,  
не отвратится, и путем спасения верно  
шествуем, с тобою же и всеми святыми поя  
Христу всерадостное пение: Аллилуиа.

Сей кондак читается трижды, после же снова

икос 1 и кондак 1





**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НОВОЕ  
ИЗДАНИЕ**